


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-60	Al-Mumtahanah	13	2	Madaniyyah	Ke-91	4





### **Zaman Diturunkan**

Surah al-Mumtahanah diturunkan di antara bulan Zul Qa'dah tahun ke-6 ketika berlakunya perjanjian damai di Hudaibiyah dan pembukaan Mekah pada tahun ke-8 Hijrah iaitu antara tahun ke-6, ke-7 dan ke-8 Hijrah. Seorang sahabat yang merupakan salah seorang ahli Badar bernama Hathib bin Abi Balta'ah telah menghantar sepucuk surat kepada orang-orang Quraisy dengan maksud menyelamatkan ahli keluarganya yang berada di Mekah. Ia menulis surat itu sebelum berlakunya peristiwa pembukaan Mekah, surat itu ditujukan kepada ketua-ketua orang-orang kafir Quraisy Mekah melalui seorang perempuan. Di dalamnya ia mendedahkan satu rahsia ketenteraan yang sangat penting iaitu Rasulullah s.a.w. telahpun membuat persiapan untuk menyerang Mekah.

Pada ketika itu ramai orang-orang perempuan Islam sampai ke negara Islam di Madinah setelah berhijrah dari Mekah (دار الكفر), dan daripada hijrah mereka timbul bermacam-macam persoalan. Antaranya ialah tentang taraf kenegaraan, kesetiaan mereka kepada negara, soal pertukaran mas kahwin dan sebagainya. Itu adalah antara masalah yang timbul pada ketika itu.

Dari segi tertib kitabi, Surah al-Hadid terlebih dahulu diturunkan, kemudian Surah al-Mujaadalah, kemudian Surah al-Hasyr dan akhir sekali Surah al-Mumtahanah, sementara dari segi tertib nuzuli pula, Surah al-Hasyr adalah surah pertama yang diturunkan, ia diturunkan pada Rabi'ul Awwal tahun ke-4 Hijrah, kemudian Surah al-Hadid pada di permulaan tahun ke-5 Hijrah. Selepas itu Surah al-Mujaadalah di akhir tahun ke-5 Hijrah dan paling akhir diturunkan ialah Surah al-Mumtahanah, ia diturunkan di permulaan tahun ke-8 Hijrah sebelum berlakunya pembukaan Mekah.

### **Perkaitan Surah Al-Mumtahanah Dengan Surah Sebelum Dan Selepasnya**

Di dalam Surah al-Mujaadalah yang lalu, pada ayat ke-14 telahpun dikatakan berkenaan orang-orang munafiq,

أَلَمْ تَرَ إِلَى الَّذِينَ تَوَلَّوْا قَوْمًا غَضِبَ اللَّهُ عَلَيْهِمْ

Di dalam Surah al-Hasyr yang lalu pula didedahkan bahawa orang-orang munafiq itu tidak benar dan dusta dalam penafian mereka terlibat dalam menyokong orang-orang Yahudi semasa perang (Ayat: 11). Di dalam ayat terakhir Surah al-Mumtahanah ini pula, orang-orang Islam diperintahkan dengan firman Allah.

يَا أَيُّهَا الَّذِينَ ءَامَنُوا لَا تَتَوَلَّوْا قَوْمًا غَضِبَ اللَّهُ عَلَيْهِمْ قَدْ يَئِسُوا مِنَ الْآخِرَةِ كَمَا يَئِسَ الْكُفَّارُ مِنْ أَصْحَابِ الْقُبُورِ ﴿١٣﴾

13. Wahai orang-orang yang beriman! Janganlah kamu jadikan teman rapat mana-mana kaum yang dimurkai Allah, mereka telah berputus asa daripada mendapat kebaikan akhirat, sebagaimana berputus



asanya orang-orang kafir yang ada di dalam kubur.

### **Beberapa Kata Kunci Dan Tema Utama Surah**

1. Surah ini menjelaskan bahawa perhatian yang serius perlu diberikan terhadap pergerakan orang-orang munafiqin demi meneguhkan kedudukan negara Islam, selain itu umat Islam juga diarahkan supaya berhati-hati terhadap pengintip-pengintip dari luar khususnya dari kalangan wanita dan orang-orang yang ada hubungan dengan negara musuh. Orang-orang Islam yang ikhlas diperintah supaya mengutamakan Islam daripada keluarga dan kaum kerabat seperti yang dilakukan oleh Nabi Ibrahim a.s.
2. Firman Allah لَا تَتَّخِذُوا عَدُوِّي وَعَدُوَّكُمْ أَوْلِيَاءَ (Ayat: 1) menyatakan polisi luar negara Islam, di dalamnya diperintahkan umat Islam supaya tidak mengambil musuh-musuh Allah dan musuh-musuh orang-orang Islam sebagai teman yang rapat. Mendedahkan rahsia negara kepada musuh dan rahsia-rahsia ketenteraan adalah suatu perkara yang sangat besar kesalahannya.
3. Melalui firman Allah لَنْ تَنْفَعَكُمْ أَرْحَامُكُمْ وَلَا أَوْلَادُكُمْ يَوْمَ الْقِيَمَةِ (Ayat: 3) orang-orang Islam difahamkan bahawa sanak saudara dan keluarga yang kadang-kadang dikasihi oleh seseorang yang ikhlas sekalipun sehingga ia tidak setia terhadap negara Islam, semuanya tidak berguna kepadanya di hari kiamat nanti.